

重修兩淮鹽法志

兩淮鹽法志卷七

王制門

德音

下

乾隆四十年十二月十六日內閣奉

上諭兩淮鹽課例限次年二月奏銷前以丁亥己丑兩綱因該處鹽場歉收是以准展至八月今乙未綱奏銷復請展限該部議駁自屬照例辦理但念該處場竈偏被旱災歉產滯運商情不無拮据著加恩將乙未綱奏銷准其展至明年八月造報至稱淮北各商上年被水辦鹽實多竭蹶著將丙申以後四綱帶完銀二十二萬餘兩一併加恩准其展限四年分

作八年完納以紓商力欽此

乾隆四十四年三月初九日奉

上諭江蘇上年被有偏災地方俱已加恩展賑其鹽屬場竈坐落各州縣情形與地方貧民無異自應一體加恩著將淮海分司所屬被災九分之板浦中正臨興三場分別極貧次貧應展賑者照例按月展賑應借給口糧者酌量借給俱著照地方災民之例一體辦理該鹽政務督率所屬實力遵行務使竈戶均霑實惠欽此

乾隆四十五年奉

上諭二套以下爲分洩盛漲之區則馬港河隄東灘地不能保

無漫溢其應徵減則地畝錢糧交薩載等查奏欽此

互見  
恤電

謹按嗣於次年三月會疏請免馬港河隄東灘地應徵減則錢糧內海州中正場折價竈地四百八十二頃六十畝九分二釐該銀一百一十一兩蘆課地五十六頃五十六畝八分應徵課銀二十八兩二錢八分四釐均以四十五年爲始照民賦一體豁免所豁地畝仍聽原戶執業部覆先行

乾隆四十七年六月奉

上諭豫省河工節經頒發帑銀五百萬兩已足敷用見在東省尙有續挑土方並辦理加賑各事宜需費繁多著卽將兩淮

商捐銀二百萬兩解赴東省以資工賑之用欽此

互見  
助工

乾隆四十七年十二月奉

上諭戶部核議各省巡鹽官兵舊有鹽規酌量應給應停數目分別定議一摺所議是已依議行矣武職員弁業經加恩改給養廉其巡緝私鹽乃分所應爲向得鹽規自應停給至外委兵丁等所得月餉無多離汛緝查飯食盤費等項不無所需自應照舊准其分別支給以示體恤此後各省不得仍前派委候補千總及額額外委等弁應令均責成專汛員弁經管而弁兵等既有盤費以資辦公更宜加意緝拏以盡職守儻有懈弛誤公及額外需索等弊著該管鹽務之人嚴查據

實參奏治罪欽此

乾隆五十年二月奉

上諭兩淮食鹽口岸滯銷積引太多課無所出若照例銃銷則鹽未銷而輸課該商不無賠累若融入綱地帶銷又恐有礙綱地卽將此一百萬兩內六十萬兩代完滯銷引課以四十萬兩交商人江廣達江正大領借俾資營運照例生息欽此  
乾隆五十年四月二十六日內閣奉

上諭全德奏海州分司所屬板浦中正臨興三場因去冬今春雨澤愆期晴乾日久產鹽有限請將乙巳綱應徵錢糧懇恩緩徵等語本年海州等屬雨澤稀少麥苗未能長發前已降

旨已將該處民戶錢糧概予緩徵至各場竈戶人等亦因晴  
久土燥產鹽未旺丁力未免拮据所有該竈戶等應輸乙巳  
綱錢糧亦著加恩緩至本年秋場產旺後再行徵收以紓丁  
力欽此

乾隆五十年六月二十八日奉

上諭全德奏泰州分司所屬伍祐新興廟灣三場坐落淮安府  
屬之阜甯鹽城二縣地方因天氣久晴糧價昂貴竈戶買食  
維艱見撥鹽義倉穀石平糶等語本年淮北各屬雨澤稀少  
業經加恩將錢糧緩徵並賞給貧民口糧以資接濟至該竈  
戶等因產鹽有限口食拮据自應一體加恩賑恤所有伍祐

新興廟灣三場乙巳綱應輸折價錢糧著緩至秋鹽產旺時再行徵收并酌借一月口糧俾無力竈丁得資口食欽此

乾隆五十年十二月奉

上諭淮北丙午綱引目提出銃銷將課項分作十年帶徵一節部議祇准其三年帶徵固屬酌核辦理但念淮北一帶近年以來河湖淺阻運艱銷滯以致綱引遞年積壓尙屬實在情形所有丙午綱引目准其提出銃銷以疏積引其該年應徵鹽課著加恩分作五年帶徵俾轉輸益資充裕以示朕體恤商力至意欽此

乾隆五十一年二月十七日奉



上諭全德奏海州之板浦中正臨興三場極次貧竈見在正賑已完等語海州場地上年被旱較重曾經降旨給賑俾災丁口食有資今屆青黃不接之時正賑已畢該丁等生計不無拮据所有板浦中正臨興三場極次貧竈著再加恩展賑一月其餘被災七分以下及勘不成災各場實在乏食貧竈亦著照例酌借口糧以資接濟欽此

乾隆五十一年十一月奉

上諭預提鹽引一事總以正引暢銷爲主如正引實在疏銷暢速卽每年預提一次自無不可儻遇額引滯銷原不妨開一二年或三四年再請預提亦無不可毋庸拘定年限惟在該

鹽政查察情形隨時核實奏請辦理至前四年未經預提年分派提兩年課項分作五年補交之處著加恩寬免以紓商力欽此

乾隆五十三年三月奉

上諭戶部議駁全德奏請將丁未綱未行綱引提出六十萬道分年帶運帶徵一摺固屬照例辦理但念該處綱引積壓過多有占新綱運行地步若照例徵納商力不無拮据著加恩照該鹽政所奏准將淮南丁未綱未行綱引內提出六十萬道分作五年帶運所有正雜錢糧亦准其分作五年帶徵以疏積壓而紓商力欽此

乾隆五十四年十月初八日內閣奉

上諭全德奏廟灣場等處邨莊閒被黃水淹浸見在雖經涸出但場亭池竈正須修理竈丁等未免拮据等語廟灣等場地勢低窪致被洩黃之水下注淹浸雖經陸續涸出而竈丁等未免修理場亭池竈未能及時煎曬鹽斤若將應完新舊錢糧一時併徵竈丁等稍形拮据所有廟灣場成災五分之十二莊本年應徵折價錢糧著加恩照例分別蠲緩其未完舊欠錢糧及借給口糧著一併遞緩徵收至勘不成災之七莊及海州三場本年應徵錢糧並歷年因災帶徵錢糧及舊欠借給口糧亦著展至來年麥熟後分作二年帶徵以示朕軫

念寵丁至意欽此

乾隆五十七年正月鹽政全德奏商人洪箴遠程檢德等願公捐銀四百萬兩請於部庫先行借撥自壬子綱起分十綱帶完歸款奉

旨此次廓爾喀賊匪滋擾後藏不過邊徼么麼卽日當可剿滅自不致多糜軍餉今據全德奏稱該商等情詞懇切實出至誠著准其捐銀二百萬兩並准其分五年帶完所有商人洪箴遠等著咨部照例議敘欽此

互見助軍

乾隆五十七年十一月奉

上諭全德奏辛亥綱辦繳玉活俱經送交造辦處所有辛工飯

食等費仍令該商等隨時給發外其應徵辛亥綱外支不敷及帶徵銀兩俱仍解交造辦處等語向來兩淮每綱應徵外支不敷銀四萬兩存貯運庫原以備成做活計之用如動用外有餘賸銀兩照例解交造辦處收存今該鹽政將成做活計之工匠飯食等項俱令該商等隨時給發而此項外支不敷銀兩並不動用仍行解交造辦處是該商等於前項應徵之外又出貲給發工匠殊非恤商之道嗣後凡有交辦活計應需工匠飯食等費俱令在每綱外支不敷銀四萬兩內動用如有餘賸再行解交造辦處毋許仍令商人捐辦以示體恤欽此

乾隆五十八年十月初五日內閣奉

上諭巴爾阿奏淮南通河綱食眾商歷年以來因帶課稍多資本較重見又增運提引商力轉輸不及等語淮南眾商向來辦運引鹽完納課項尙屬奮勉急公茲因節次統銷及公捐等項分年完納商力稍形竭蹶且帶徵各款尙非正項錢糧可比所有淮南不入成本之統銷食引及統銷王子綱引並節次公捐借撥庫項等款共銀三百六十九萬餘兩著自甲寅年起分作十年帶完以紓商力此朕格外加恩嗣後不得援以爲例欽此

乾隆五十八年十月奉

上諭巴爾阿奏從前兩淮總商江廣達過繼之子江振鴻人尙明白見在家道消乏等語江廣達充當總商有年辦理公務尙爲出力今念伊繼子生計艱窘自當量加軫恤江廣達舊有康山園一處本家無力修葺著傳諭董椿卽令眾商出銀五萬兩承買作爲公產其銀兩卽賞給江振鴻營運毋庸起息又江廣達舊借帑項二十五萬兩業經繳還並著於交內務府閒款內撥借銀五萬兩照例起息其所借本銀不妨令其從容繳納江振鴻得此十萬兩作爲營運資本伊家生計自必漸次寬裕以示體恤欽此

乾隆五十九年八月初三日內閣奉

上諭鹽政清釐嵯務有管束商人之責理宜清操自矢潔已奉公方足以資整飭前據董椿奏兩淮鹽政衙門每日商人供應飯食五十兩又幕友束修筆墨紙張並一切雜費銀七十兩每日共銀一百二十兩是該鹽政一切用度皆取給於商人以一年計算竟有四萬三千餘兩之多試思尙膳房度支經費康熙年間需費較多然比之前明光祿寺所用減損已不啻倍蓰至朕臨御之初兼有

慈甯甯壽二宮分例已比康熙年間大減今則

慈甯甯壽二宮分例並無其事見在宮闈祇有二妃二嬪以及諸皇子皇孫等並軍機大臣上書房南書房以及侍衛章京



拜唐阿等各分例每年膳房所用通計僅止三萬餘兩以朕  
玉食萬方其進奉之數不過如是此非故爲節儉而膳羞所  
需已無可復加朕子愛黎元施恩加惠初不惜億萬帑金  
豈獨於尙膳經費有意從減而每年僅止此數卽如戶部尙  
書得項較優每年亦止五千餘兩外省督撫至多者不過二  
萬金鹽政官秩微末司員乃每年供應竟至有四萬三千餘  
兩之多是不但驕奢過分亦且折福以致不能承受恩眷遇  
事往往昏憤錯謬得罪實由於此况鹽政每年例進物件又  
係商人承辦並非自出己資更何得復令商人似此逐日供  
應致啟交結婪索之弊總由該鹽政應得養廉向有因公坐

扣之項輒藉此爲辭諸弊叢生殊非政體但此弊已久今亦不加追問嗣後兩淮鹽政所有商人一切日費供應俱著一律裁革其每年應得養廉著實支領銀五千兩以資食用而杜弊端仍著總督隨時留心嚴密查察該鹽政旣實給養廉已爲優厚辦公儘屬有餘儻復陽奉陰違仍令商人相沿供應並此外有藉端需索情弊一經查參必當視巴甯阿等加倍治罪決不姑貸欽此

乾隆六十年閏二月二十五日內閣奉

上諭據蘇楞額奏兩淮各場緩徵折價銀並借給口糧應徵穀價銀共七萬九千一百五十兩零均係因災遞緩之項等語

前經降旨普免天下積欠錢糧場竈積欠與民戶無別所有  
兩淮應徵緩徵折價及借給口糧穀價銀七萬九千一百五  
十兩零並著加恩一體豁免以示朕施惠推恩有加無已至  
意欽此

互見  
恤竈

乾隆六十年閏二月鹽政蘇楞額奏據商人洪箴遠等願  
公捐銀二百萬兩先於部庫借撥分作六年帶完歸款  
奉

旨逆苗句結滋擾本屬烏合之眾見當大兵雲集福康安和琳  
統領黔蜀勁旅進剿卽日殲除盡淨綏靖地方軍需一切費  
項無多所有此項商捐銀兩著准收一半分三年帶完歸款

欽此

謹按嗣於十一月鹽政蘇楞額以商情懇切復據呈  
奏蒙

恩俞允並准於前項分年帶完之後續分三年歸款仍交部一

併照例議敘

互見  
助軍

乾隆六十年夏秋海屬雨水淹漫池井鹽政蘇楞額勘板  
浦中正臨興三場不致成災奉

旨將本年應徵五十九年折價緩至明年麥收後啟徵欽此

嘉慶四年三月鹽政徵瑞奏商人洪箴遠等呈稱川陝逆  
匪指日告蕲願公捐銀三百萬兩以備善後之用懇請

於運庫正項留存備撥銀內分作兩年六次撥解卽於  
己未綱起分六綱帶完歸款奉

旨准其交銀二百萬兩卽照所奏按次解交部庫並著將該商  
眾等交部照例分別給予議敘以示優獎欽此

互見  
助軍

嘉慶四年五月初九日內閣奉

上諭徵瑞奏兩淮眾商懇請將前次未經賞收銀一百萬兩仍  
准捐輸一摺在該商眾等因兩淮鹽務疊荷恩施復行呈懇  
固屬出於感激悃忱但前此請輸銀兩業經酌量賞收徵瑞  
自應遵照曉諭眾商又何必復行瀆請借商力以自爲見好  
地步况見在川陝賊匪以次殄平大功不日可竣卽暫開籌

備川楚善後事例見已停止更何須重煩商力耶所有此項減免銀一百萬兩著仍遵前旨毋庸交納欽此

嘉慶五年正月鹽政書魯奏商人洪箴遠等呈稱川陝匪徒剿盡凱旋在即情願再捐銀二百萬兩請先於運庫墊解連前次捐輸一百萬兩自辛酉綱起分四年歸款奉

旨將上次未收銀一百萬兩再行賞收其餘一百萬兩著不必交納欽此

謹按嗣於二月書魯以商情懇切復據呈奏奉

旨著再賞收五十萬其餘不必復行瀆懇至捐輸各商著加恩

交部量給議敘以示獎勵

互見助軍

嘉慶六年五月書魯奏據商人洪箴遠等呈稱願公捐銀二百萬兩請於運庫徵存銀內照數墊解自壬戌綱起分五綱帶完歸款奉

旨各路連奏捷音大功卽日告歲善後各費固需籌備而京師自本月初旬大雨傾注永定河水勢漲發決口四處附京州縣多被淹浸見派員分投賑卹堵築需用正多該商等公捐銀二百萬兩照數賞收著書魯將一半陸續解京以備堵築要工及撫卹之用其餘銀兩存貯運庫候撥並查商捐姓名從優議敘以示獎勵欽此

互見助軍

嘉慶七年八月二十二日奉

上諭給事中蕭芝奏稱江西受旱十有一府目下雖市糧無缺恐今冬明春無所接濟請將兩淮鹽義倉穀石碾運江西以資平糶等語此事可行上年因湖北被災曾經將兩淮鹽義倉貯穀十萬石協濟湖北今江省被旱事同一例且兩淮鹽斤向於該省行銷此時自應周其所急著兩淮鹽政估山卽於鹽義倉存貯穀內酌動若干石一面奏聞一面碾運派員押送交巡撫張誠基分撥被災各府屬妥爲平糶用資民食欽此

嘉慶七年九月二十一日奉



上諭給事中魯蘭枝奏謹陳籌荒一得一摺本年江西省閒被水旱收成歉薄業經加恩緩徵給賑並撥兩淮鹽義倉穀十萬石運往平糶以資接濟所稱該省士民有願赴川買米者請官給路票此不可行欽此

嘉慶七年十一月奉

上諭估山奏淮南引鹽因本年揚州一帶雨澤稀少場河乾涸趕運稍遲而湖廣江西等省收成歉薄未能暢銷淮北引鹽亦因夏秋亢旱場河淺阻發運較少請將奏銷展限等語該處綱鹽壅積納課維艱自係實在情形著加恩將壬戌綱來年二月奏銷展限半年仍照例自癸亥綱起每年提上一月

至戊辰綱復歸二月原限俾得從容轉輸以示體恤該鹽政務須設法督催趕運勿令稽遲欽此

嘉慶十年五月兩江總督鐵保奏總督兼管鹽務向有永豐壩泰壩二處稽查鹽包夾帶每引提公費銀二分歸總督衙門因公動用每年約得銀二萬兩有奇歷任或於偶被偏災時捐賑於此內提用奉

旨應積存些須辦理急賑爲是鐵保又奏前項引費係屬外銷並無定款請以八千兩給三省兵丁差費禁止扣餉五千兩儲備海口緝匪添給口糧並免扣武職養廉三千兩酌添各府書院膏火並地方緊要公用餘項仍留爲

總督衙門閱兵防汛辦公之用奉

旨固係好事若有不肖營弁仍扣兵餉斷不可恕從嚴辦理江甯蘇州耳目較近易於查覈安徽江西鞭長莫及恐中飽不肖營弁之私囊仍屬無益耳又奉

諭且莫定數試行二三年後再定營伍固宜體恤汝之費用頗多不止此一項寬餘最妙勿太拘謹朕不罰大吏養廉不令自行議罪之故非惜大吏也保全大吏之清操保全小民之性命汝當知此意勿忽欽此

嘉慶十二年六月初六日奉

上諭朕聞額勒布在兩淮鹽政任內實能力崇節儉殊屬可嘉

但該鹽政一人狷潔自矢而鹽務大小各官未必能同心合意從前兩淮鹽務浮費每年不下數百萬兩近年雖節次裁禁若鹽務各官不能潔已自奉則浮費仍屬不少於商力未免有虧見因商力疲乏成本不敷與其例外加增曷若節省糜費以濟公用著額勒布將兩淮鹽務無益閒費確切查明一律禁革將每年節省銀兩貼補成本豈不於商民較有裨益該鹽政務須斟酌妥善先將該處浮費情形據實具奏欽此

嘉慶十四年十二月二十四日奉

上諭兩淮鹽政阿克當阿奏上年夏間洪湖異漲各壩齊開場

竈被淹見屈加斤期滿懇請展限已降旨加恩矣因思上年  
洪湖盛漲係安徽潛山地方起蛟上游水勢陡漲湖身驟難  
容納以致啟壩宣洩民舍田廬多被淹浸爲害不淺伐蛟見  
於月令昔人有行之者若地方官倣照成法先事預防何至  
倉猝患生但此事一經胥吏辦理轉恐有名無實著董教增  
轉飭各府廳州縣勸諭居民務須於深山窮谷隨時留心察  
看創挖在百姓等自衛身家自無不實力奉行較之官爲經  
理更有裨益也欽此

嘉慶十六年九月內閣奉

上諭阿克當阿奏勘明場竈被災分數一摺本年五月間王營

減壩漫口下流場竈被淹經朕降旨撫恤並令阿克當阿查明被災分數再行降旨施恩茲據奏稱板浦四疇暨莞瀆五莊被災實有十分其徐瀆三疇臨興九疇涸復已有十分之五均勘不成災等語著加恩將成災十分之板浦四疇中正四疇莞瀆五莊俱照例給賑其勘不成災之徐瀆三疇臨興九疇貧竈鮮有蓋藏寒冬拮据亦著加恩分別給賑蠲緩以資接濟並著該督撫等飭令司道等將各場應賑極次貧竈戶口給賑月分並成災頃畝新舊折價錢糧應蠲應緩及勘不成災場分應行緩徵遞帶以至坍房修費各項分別查明辦理以副朕軫念災區至意欽此

嘉慶十九年八月十八日奉

上諭阿克當阿奏江廣鹽引滯銷逾限未完懇請再行展限一摺前因癸酉綱江廣鹽課積壓至六十餘萬引展限至本年七月奏銷茲屆限滿岸銷不暢尙有未請運鹽四十萬餘引著加恩再展限五箇月於本年十二月奏銷仍自甲戌綱起按年提上一月至癸未綱止復歸二月原限以紓商力阿克當阿及督銷不力之各該鹽道等著交部分別議處欽此  
嘉慶二十三年四月初五日奉

上諭

皇考高宗純皇帝乾隆元年正月

諭總理事務王大臣私鹽之禁所以除蠹課害民之弊大夥私梟每爲盜賊逋藪務宜嚴加緝究至於失業窮黎肩挑背負易米度日不上四十斤者本不在查禁之內乃近見地方官辦理私鹽案件每不問販鹽人數多寡商人又添私雇之鹽捕水路又添巡鹽之船隻此種無賴之徒藐法生事大梟公然賄放窮民擔負無幾輒行拘執或鄉民市買一二十斤者並以售私拏獲著直省督撫嚴飭各府州縣實拏姦商大梟勿令疏縱其有愚民販私四十斤以上被獲者照例速結不得拖累平人至貧窮老少男婦挑負四十斤以下者概不許禁捕所有商人私雇鹽捕及巡鹽船隻俱嚴查禁止等因欽



此仰見我

皇考周知民隱於地方官吏緝捕私鹽之情弊

洞燭無遺朕昨因慶保等奏楚省緝私情形降旨諭各鄰省督撫協同查緝不但堵截私鹽兼可翦除匪類並令嚴查官役包庇賣放之弊禁止商夥添雇鹽捕擾累平民與

皇考從前所降

諭旨悉皆符合著該督撫等嚴飭所屬文武員弁各於要隘地方訪察姦商夾帶大梟私販一體實力緝拏按律懲辦不得任聽不肖兵役及私設鹽巡濫拏肩挑背負之人徒滋擾累庶姦民知所畏忌官引得以暢行於國課民生均有裨益也

欽此

嘉慶二十三年奉

上諭兩淮綱食鹽引壅滯多有積壓一時不能倍運倍銷加恩著照所請將戊寅淮南綱食鹽引提出一綱自巳卯綱起分作十年帶運卽隨同各綱奏銷欽此

嘉慶二十五年十一月戶部議奏兩淮鹽政延豐奏玉貢折價七十餘萬兩節省玉貢九十餘萬兩請分年帶解奉

上諭兩淮玉貢折價始自近年玉器旣免呈進此項折價銀兩嗣後著停其交納其節年未解玉貢折價銀七十餘萬兩未

報節省玉貢銀九十餘萬兩均著加恩豁免欽此

道光三年三月二十二日內閣奉

上諭孫玉庭等奏遵旨將部駁淮南商懸墊息本各款查明登覆懇請恩施一摺兩淮積年懸墊銀數過多見行辛巳壬午癸未三綱皆屬減半折行賠課若加以勒追墊款商力實形拮据著照所請加恩將辛巳等三綱一半賠課銀共二百三十八萬餘兩全數停扣讓出地步追補懸墊其扣停之銀同嘉慶二十五年奏准扣留之四百六萬餘兩一併自甲申綱起分五綱帶徵歸款至原發本銀四百七十餘萬兩著仍留通綱按年完息提引等款銀三百萬兩本息著自己丑綱起分

五綱歸還俟徵還一綱之本減除一綱之息於各綱徵限內按數報撥並專商借領之一百七十六萬餘兩先歸通綱徵完仍飭各本商按照原借之數分二十限完繳至捐帶二款著俟原懸息本全清之後於甲午起分二十綱徵還其淮北積引著將壬午正帶引目四十九萬餘道提出統銷應賠正課及舊欠底馬鹽本均照原奏歸淮北綱引分年通攤以紓商力再另片奏准商報捐未繳疊經展限帶徵銀五百十四萬六千七百九十兩零著加恩准予豁免以示體恤兩淮商力疲乏節經曲予調劑此次復允該督等所請實因眾商力有不逮格外施仁嗣後該督等務當認真清釐徵解相符俾

下州鹽法司卷十  
二  
鹽務日有起色儻仍辦理不善迄無成效惟該督等是問恐不能當此重咎也欽此

道光十一年七月二十六日奉

上諭陶澍奏場所被水設法籌濟一摺淮鹽綱食各岸地暨煎鹽捆鹽各場所同時被水場竈煎丁及運夫捆工等人眾繁多值此大災自應設法救濟據該督查有鹽義倉穀一項早經虧缺徵變發商買補尙應有穀十餘萬石以二穀一米計算應得米五六萬石著准其散布各場及揚城儀徵災務之用以資救濟其被水成災各地畝錢糧著查勘明確具奏辦理欽此

互見

恤竈

道光十六年五月初九日奉

上諭上年

皇太后六旬萬壽降旨普免道光十年以前民欠錢糧令該將軍府尹督撫等查明具奏據陶澍查明道光十年以前鹽場竈欠數目開單呈覽當交戶部核覆茲據查明兩淮泰州海州二分司所屬各場共欠因災緩徵折價銀十九萬一千七百五十六兩零隨徵耗羨銀一萬七千四百九十七兩零又因災借給口糧銀十三萬七千六百七十四兩零均係實欠在竈之款著加恩一體豁免該督卽刊刻謄黃徧行曉諭並照例按戶付給免單嚴察吏胥影射需索等弊務令實惠及

民用副朕錫羨推恩至意欽此

道光十九年奉

上諭陶澍前在兩江總督任內整頓漕綱修復水利遺愛在民除入祀名宦祠循例具題外所有該紳士懇請捐建專祠之處准其擇立以順輿情而彰政績欽此

光緒二年二月兩江總督沈葆楨奏湖北補用同知直隸州孝感縣蔡炳榮疏銷淮鹽出力請將該員俟補同知直隸州後以知府補用奉

旨著照所請欽此

光緒三年四月兩江總督沈葆楨奏本年二月安東城守

協外委趙良彩因捕私梟受傷殞命五月二十三日奉  
旨趙良彩著交部照陣亡例議恤欽此

光緒七年七月兩江總督劉坤一奏報泰屬各場同遭風  
潮情形閏七月奉

旨著該督飭屬妥爲撫恤勿任失所欽此

光緒八年三月奉

上諭通泰場地隄墩年久失修一遇風潮驟至竈戶倉猝被  
災情形可憫自應速籌修復卽著左宗棠督飭官紳集費  
興工覈實辦理俾資捍衛欽此

光緒十年二月兩江總督曾國荃奏承辦范隄出力員弁



仍懇擇尤保獎三月初十日奉

旨著准其擇尤保獎他處不得援以爲例欽此

光緒十二年五月十七日奉

上諭曾國荃奏神靈顯應懇頒匾額一摺江蘇海州板浦鎮  
龍王廟向著靈應光緒十年十一年夏間天氣亢晴河水  
淺涸經該官紳等虔詣祈禱立沛甘霖鹽艘賴以暢行甯  
地亦轉歉爲豐實深寅感著南書房翰林恭書匾額一方  
交曾國荃祇領敬謹懸挂以答 神庥欽此

兩淮鹽法志卷七

制詔明 諭旨下

兩淮鹽法志卷八

王制門

聖製

聖祖仁皇帝

高宗純皇帝先後

六巡江浙

駐蹕淮揚

宸翰法物之頒便蕃絡繹

恤商隱則軒鏡心懸

垂天章則義文手勒崇實黜華貽留萬禩

堯咨舜傲吁俞如聞非惟千古藝林之弁冕實亦一朝離政之  
球圖也茲錄其關涉淮鹽者恭載於篇志

聖製

御製詩

幸茱萸灣行宮登五雲樓

康熙四十四年

財賦稱茲地時巡復此經春膏宜豆麥煙景遍林亭靡麗風  
應換敦龐訓履形施恩頻已責聊爾翠華停

述懷近體詩并序

康熙四十六年

朕每至南方覽景物雅趣川澤秀麗者靡不賞玩移時也雖  
身居九五樂佳山水之情與眾何異但不至曠日持久有累

居民耳所以一目卽過者亦恐後人錯借口實而不知所以然也至於茱萸灣之行宮乃係鹽商百姓感恩之誠而建雖不與地方官吏但工價不下數千嘗覽漢書文帝惜露臺百金後世稱之況爲三宿所費十倍於此乎故作述懷近體一律以自警又黏之壁閒以示維揚之眾

又駐塔灣見物華先存葑屋重桑麻惠風徧拂維揚市沛澤均沾吳越家作鑑道君開艮嶽長噓煬帝溺瓊花澆胸經史安邦用莫遣爭能縱欲奢

塔灣行宮恭依

皇祖詩韻

乾隆十六年

南來逐處仰

重華此日重教韻和麻但得一心常守敬從知四海永爲家省  
方咨度惟耕織悅已奇袞戒鳥花數字行宮無藻績

昭垂作法恐其奢

過維揚郡城

乾隆十六年

淮海維揚下下田茲看撲地聚人煙古今奚必無殊異豐嗇  
從來有轉旋藏富於民欣接轡返華以樸憶陳編百年休養  
八埏靖致此其難益慎旃

詠平山堂梅花

乾隆十六年

平山萬樹發新花勝舉清遊兩可誇

平山向無梅茲因南巡  
鹽商捐貲種萬樹既資

清賞兼利貧民故不禁也試問歐公應可否相形鄧尉並橫斜憑參疏影生香趣未許歌鶯語燕譁不種牡丹種梅朵殢財人亦厭繁華

天甯寺行宮作

乾隆二十二年

行館招提右韶春駐翠華所欣無藻績頗足賞清嘉絲柳纔舒葉玉梅已放花謝家風雅近率欲罷吟義

香阜寺

乾隆二十二年

鎮過東山蔽芾棠畫艦卓午泊維揚莊嚴靈鷲標臺麓

又名小五

臺

起伏來龍分蜀岡古佛參來雖似悟萬民視處祇如傷新

河十里羣商濬敬上賙貧聽豈妨

從香阜寺易輕舟由新河直抵天甯寺行宮乃羣商

新開旣表敬公之心且去歲藉  
此以工代賑頗益貧民故聽之

### 塔灣行宮恭依

皇祖詩韻

乾隆二十二年

廣陵風物久繁華  
下下翻堪樹五麻  
可識古今不同俗  
由來中外莫非家  
沿場弱柳搖金縷  
映砌芳梅綴玉花  
樸斲總存

### 昔年制

### 奎章曾是戒紛奢

自高旻寺行宮再遊平山堂卽景雜詠

乾隆二十二年

前朝煙棹甯耽玩  
供帳因他率已陳  
自是晴明山色好  
重教游騎策高旻



富庶從來說廣陵滿城絲管映街燈唐風擬令崇淳約謀食

貧人慮失憑

商人習爲侈靡其技巧役之貧民藉以餬口者甚眾亦損有餘補不足之道若令如唐魏儉嗇

則土著益艱於謀食故不之禁

春風行館憩天甯早見平山黛色青便進湖船漾新碧且看夾岸畫爲屏

一株綠柳一紅欄絲繹沿隄引木蘭小令還輸蘇氏軾

蘇軾有三

過平山堂下小詞

東山未擬謝家安

潤含新麥綠睽寬恰是淮南第一觀試想風流賢太守詎因

歌舞助清歡

蜀岡游罷催歸轡畫鷁原遲十里餘

是日自高旻行宮策馬度郡城至天甯行宮易

湖船歸亦仍之以馬便船馬北南殊所習始知古語信非虛  
於船且百姓得近光也  
駐蹕天甯寺行宮作 乾隆二十七年

別館天甯古寺邊居停許就舊材便雖然商力非民力但覺  
今年勝昔年墨斗硯山足遣逸琪花瑤草底須妍省方更切  
還洎意不爲怡然爲憮然

塔灣行宮再依

皇祖詩韻

乾隆二十七年

二月東風桃始華南巡本意厪桑麻郡城南過甘泉市行館  
還依法苑家澤國今其足衣食廣陵古漫詔煙花牖民不藉  
重申命

皇祖詩篇早戒奢

大觀堂六韻

乾隆二十七年

行館天甯側文槐額大觀省方協中正設教戒遊盤式展九

歌義匪求一已安增華稍踵事爲愧不因歡

去歲在京聞淮揚行館視前巡

頗有增葺召鹽政高恆入京面飭則稱建置已成不能更罷今來駐驛實覺過華不爲喜也

民力雖無藉

商財詎可殫舜巡知弗逮禹德繼誠難

自高橋易舟至天甯寺行館卽景雜詠

乾隆三十年

溪河廿里進輕舟行館天甯擬駐留問景誰當繫清戀平山

待我有蘇歐

三月煙花古所云揚州自昔管絃紛還瀆擬欲申明禁慮礙

翻殃謀食羣

常謂富商大賈出有餘以補不足而技藝者流藉以謀食所益良多使禁其繁華歌舞亦誠易

事而豐財者但知自膏豈能強取之以贍貧民且非王道所宜也化民移俗言之易而行之難率皆類此

夾岸排當實厭閑殷勤難卻眾誠殫怡從耕織圖前過衣食攸關爲喜看

煙溪幾轉到天甯古樹眞花蔚淨馨調御堂堂還丈六不絲毫分示遷停

塔灣行宮四依

皇祖詩韻

乾隆三十年

乘氣甯關玩物華籌民本計厘禾麻庶繁郡過蕪城市瀟灑軒依鹿苑家金柳已搖高下縷玉梅都放淨娟花

天章賡和知

垂訓蒙業承平意敢奢

渡江駐驛高旻寺行宮作

乾隆三十年

蘭舸渡江津花宮及暮春毋奢仰

祖訓

恭讀序復引漢文惜露臺事以示維揚商民

皇祖御製行宮詩碑有莫遣爭能縱欲奢之句

宜遵

有事此躬巡機鑑惟勤政情田祇厘民覲揚瞻後矣

魏蕩共

高旻

文匯閣

乾隆四十五年

皇祖崇經訓圖書集大成分頒廣流布高閣此經營

閣中貯分頒古今圖

書集成此閣亦倣范氏天一閣爲之規擬范家制工因商眾擎亦堪匹四庫全書繁重不能分貯各處故祇賜圖書集成一部永以貯層費

### 塔灣行宮五依

### 皇祖詩韻

乾隆四十五年

五度南巡五歲華亦經五次韻賡麻豫遊敢逞已之欲中外

由來帝者家貼耳早嫌絲與竹怡情那在鳥和花

### 堯年行館惟斯一茲漸多空言戒奢

### 萬壽重甯寺紀事

乾隆四十九年

### 天甯寺後建重甯眾志殷勤未可停

昨歲兩淮鹽政伊齡阿奏眾商籲請於揚州之

天甯寺後增建寺宇以申忱悃念其出於至誠因俞所請賜名萬壽重甯寺

祝頌雖稱七月什莊

嚴過甚梵王經卻看植竹還植卉奚必有池更有亭太守閒

情留嶺在

梅花嶺在萬壽重甯寺旁府志載明吳秀守揚州時開洛城濠積土為嶺樹以梅因名梅花嶺幾

株仍賸古梅馨

塔灣行宮六依

皇祖詩韻

乾隆四十九年

最古行宮樸不華

奎章拈韻六之麻

塔灣行館乃制樸素曾經

皇祖南巡時所幸舊宮規御題詩用六麻韻恭依賡

和者亦六度矣

一心無繫於何繫四海為家即此家熟路重來識堂構行春甯

為賞煙花

庸歌六次依成句擒筆於斯興正奢

御製文

高旻寺碑記

康熙四十三年

茱萸灣者乃維揚俗稱寶塔灣也居三岔河之中南眺金焦諸峯北枕蜀岡之麓足爲淮南勝地凡上江由儀徵下江由瓜步至此皆會歸運河而北上也朕比歲以來躬臨河干諮詢經畫者屢矣每抵一處未嘗不懷保編氓施惠工商故兩淮鹽課永減額徵停輸贏羨又聞往來迎送費用私派者甚鉅特頒嚴旨盡爲禁止從此商民得以安席漸皆獲所則朕之巡幸者少有益乎朕三十八年奉



皇太后鑾輿偕行晨昏侍養視河旣畢勉從輿請濟江而南周覽吳會民生風俗見茱萸灣塔歲久寢圯朕欲頒內帑略加修葺爲

皇太后祝釐而眾商以被澤優渥不待期會踴躍赴公庀材協力惟恐或後不日告竣舊刹式廓鼎新莊嚴宏敞兼以輦飛傑閣憑高四眺臨大江通南北因書額賜之曰高旻寺勒文於石垂示久遠惟是雨暘應時河海清晏一時其臻於仁壽之域斯四十餘年宵旰勤民之念所厚期也卽此塔工蒞事具見羣情愛戴之誼出於至誠是亦有不可泯者爰爲書之以志始末云康熙四十三年秋九月重陽日書

萬壽重甯寺碑記

乾隆四十九年

天得一以清地得一以甯王得一以貞天言清而地言甯清故甯也天地清甯而王以貞貞卽壽也乾隆甲辰孟春六巡江浙先敕疆吏省供頓節勞費兩淮鹽政伊齡阿奏眾商籲請於天甯寺後增建萬壽寺以申忱悃且請敕賜寺名勒文以紀天下之祝上不過以華封永保歸美君上而君之奉

天子民以求萬邦黎庶之甯則未可以一言盡者朕臨御四十九年率

祖攸行六巡江浙計民生之最要莫如河工海防凡一切補偏救弊因時制宜之方亦旣殫精勞思夙夜講求不惜數千百

萬帑金以斬一勞永逸爲億兆生靈永遠安全之計茲幸南北河工自開放新河之後化險爲平海塘石工依限告成是以年逾古稀省方問俗不敢康甯夫

天以下民之甯爲甯天子以天下之壽爲壽適求厥甯文王所以兢兢也惟恭則壽周書所以惓惓也茲寺之建出於商民至誠因俞所請賜額曰萬壽重甯寺蓋合萬姓之壽以爲壽所以爲萬壽也以下民之甯爲甯所以爲重甯也如是而重熙累洽以至於萬有千歲眉壽無疆我君民永享昇平之福以迓

天庥不競不綵不剛不柔敷政優優百祿是適豈不美乎至於

寶相莊嚴法輪常轉以不可思議因緣證無量無邊功德所謂天以四時循環生成萬物聖人之教迭相扶持以化成天下其道一也因敕發內廷所供佛像安奉斯寺使夫寶月金容青蓮妙相長明法藏宏濟羣生則萬民之所以爲壽卽

天地之所以清甯而又何必華封天保頌揚稱美之文乎是爲記

敕兩淮都轉鹽運使司鹽運使

乾隆三十年九月

茲以鹽賦國計攸關亟須清理命爾以道臣體統行事務要約束衙門官吏胥役俾恪遵法紀無致作弊生事擾害商民該司本源旣正方可表率僚屬用循職業爾宜招集商人徵

核正課應行引目務立簡明則例以示綏懷仍嚴察場竈戶  
丁稽核派銷斤引飭捕役以緝私鹽省虛費以速徵納剔侵  
蠹以疏積壅察照近日戶部覆議鹽政逐款舉行凡行鹽地  
方該管州縣悉聽管理兼管下河水利其鹽場火伏及三江  
青山二營暨各委巡備弁兵役並各處鹽義倉穀俱歸爾鈐  
束經管至各處運鹽河道閘壩凡遇河防宜洩漕運攸關之  
處遇有挑浚修理工工程爾同淮揚道會核計辦所屬各官如  
有貪污溺職縱役侵漁應審問者先行審問應劾奏者呈報  
巡鹽御史劾奏敕中開載未盡事宜有應斟酌損益裕國便  
商者呈報巡鹽御史商確妥當具奏施行爾仍聽巡鹽御史

併該督撫考成舉劾爾受茲委任當持廉秉公釐奸剔弊務使商竈輻輳國課充裕斯稱厥職如或貪黷乖張耗蠹叢生病商虧課國憲具在必不輕貸爾其慎之故敕

敕兩淮鹽政武備院卿佶山

嘉慶十年六月

茲命爾巡視兩淮鹽課并兼兌漕糧察照戶部所定運司分司場竈官丁亭戶照例統理該管各府州縣額引照舊督銷凡邊商內商正課餘鹽引目俱屬爾徵核該管衙門官吏胥役宜嚴加約束使恪遵法紀毋致作弊生事擾害商民不得委官盤察借名訪惡取贖科贓該衙門公費犒賞等項通行減省蘇商竈之積困裕國課之本源仍博採利弊斟酌損益

至於江海鹽徒私販公劫嚴行衛所有司緝捕防杜亂萌但不許另外生事苛求勿得將貧難小民負鹽易食者概行擾害如鹽政有應會督撫衙門須與參酌施行所屬行鹽司道府州縣官員有怠玩溺職貪取侵課干涉鹽政應爾完結者卽行完結應參奏者具疏參奏請旨處分其廬鳳淮揚四府及徐州徵兌漕糧仍命爾兼理監兌必以時催完無誤急需敕內開載未盡事宜聽爾酌便請行爾受茲委任須持廉秉公剔奸釐弊通商裕國斯稱厥職如或貪黷乖張因循怠忽貽誤國計貴有所歸爾其慎之故敕

鹽政箴

嘉慶二十年四月

鹽法講求因民所利國課攸關設官分治徵收督催酌中定議豐歉不齊審時度地貴賤均勻疏通壅積淡食既除銷引免累緝私必嚴謹防作偽徵權公平閭里恩被

宸翰

康熙三十八年

聖祖仁皇帝南巡

御書紫垣二字

賜兩淮巡鹽御史卓琳恭懸鹽漕察院署又

御書揚仁風三字

賜兩淮鹽運使劉德芳恭懸鹽運使司署



康熙四十二年

御書牙繡松廳四字

賜兩淮巡鹽御史羅瞻恭懸儀徵察院署

康熙四十四年

御書寶忠堂三字又天高雲共色夜永月同清楹聯

賜兩淮鹽運使李燦恭懸鹽運使司署

康熙五十九年

御書守課保商四字

賜巡鹽御史張應詔恭懸鹽漕察院署

雍正四年

世宗憲皇帝

御書唐魏徵十思疏

賜巡鹽御史噶爾泰恭懸鹽漕察院亦懸儀徵察院署

乾隆十六年

高宗純皇帝

御書筴海流膏四字

賜巡鹽御史吉慶恭懸鹽漕察院署

乾隆三十年

御書政肅離綱四字

賜巡鹽御史高恆恭懸鹽漕察院署

謹按

聖祖仁皇帝

高宗純皇帝

巡幸江淮

天章

宸翰燦若日星備載

南巡盛典暨江南郡縣各志茲恭錄其有關鹺務者以見  
列聖仁民惜商之至意焉

又按鹽漕察院署在揚州舊城內前兩淮鹽運使洪

汝奎卽其舊址恭建

萬壽宮餘基蓋鹽義倉若干閒儀徵察院署在儀徵東門外今

存舊址

兩淮鹽法志卷八

兩淮鹽法志卷八

王制門 聖製